

LETTRES ET ARRESTS DE LA COUR DE PARLEMENT de Normandie,

Enuoyées à la Cour de Parlement de Paris, pour
l'Adjonction desdites Cours, & affaires presentes.

Auec Arrest portans ladite Adjonction, du 5. Febrrier 1649.



A PARIS,
Par les Imprimeurs & Libraires ordinaires
du Roy.

M. DC. XLIX.
Auec Privilège de sa Majesté.

LETTRES

ET ARRESTS DE

LA COUR DE PARLEMENT

de Normandie,

Enregistrés à la Cour de Parlement de Paris, pour
l'Adjonction desdites Cours & autres prérogatives.

Donné à Paris le premier jour d'Avril l'an de l'Eclaircissement.



A PARIS,

Par les Imprimeurs & Libraires ordinaires
du Roy.

M. DC. XLIX.

chez le Printeur de la Haye.



Du 5. Februrier 1649. du matin.

CE I O V R, la Cour toutes les Chambres
 assemblées, aduertie que l'un des Con-
 seillers du Parlement de Roüen, estoit
 au Parquet des Huissiers, & demandoit
 à parler à ladite Cour, A esté fait entrer le Sieur
 Miron, Conseiller audit Parlement, lequel ayant
 pris place au Bureau, a dit, Qu'il auoit vne Lettre
 dudit Parlement adressante à la Cour, & auant que
 de la donner, a exposé sa Creance, faisant mention
 de ladite Lettre & de trois Arrests imprimez, datez
 des 27. 30. Ianuier & premier de ce mois & an, Des-
 quels & de ladite Lettre ouuerte, ayant esté fait
 lecture, ledit Conseiller a représenté, Que la Cour
 voyoit l'intention dudit Parlement, qui estoit d'en-
 tenir vne parfaite correspondance & intelli-
 gence avec elle, Qu'il auoit seulement ordre de
 prier la Cour d'arrester, qu'il ne seroit fait aucun
 accommodement, que les interets dudit Parle-
 ment de Roüen n'y fussent compris, & de donner
 Arrest contre le Semestre, conforme à celuy du-

4

dit Parlement; Que les nullitez de cét establissement estoient assez cognues, Qu'il estoit fondé sur vn faux & calomnieux pretexte, par des personnes qui auoient defaut de puissance, n'agissans qu'en vertu d'vne Commission non verifiée, Qu'il auoit esté reuoké par vn iuste mouuement du defunct Roy dernier decedé, & restably sur des suppositions pendant vne minorité, Laissoit à la Cour de iuger ce qui estoit à faire.

Monsieur le-Premier President a fait remerciement, Dit, que la Cour void l'intention du dit Parlement, Que sur les deux Articles seroit deliberé, & fait resolution, & que la Cour luy feroit entendre, & s'est retiré.

LETTRE DE CREANCE DE LADITE
Cour de Parlement de Normandie,

Enuoyée à Monsieur Miron, Conseiller du Roy en
ladite Cour.

NRES-CHER FRERE, Nous vous enuoyons la Lettre que nous écriuons à Messieurs du Parlement de Paris, pour que vous ayez à la presenter de nostre part, & les asseurer que nous contribuërons de tout nostre pouuoir au bien public & repos de l'Estat.

Nous


J

Nous vous enuoions aussi les Arrests que nous auons donnez , tant pour les affaires generales que pour ce qui regarde les pretendus establissemens du Semestre de ce Parlement , que nous auons trouué si defectueux en leur forme , que nous n'auons fait difficulté de declarer les registremens & verifications desdits Edicts , ainsi que les receptions faites en consequence , nulles & de nul effet ; Les motifs duquel Arrest nous estimons vous estre assez cognus , pour que vous en puissiez entretenir Messieurs du Parlement de Paris , lors que les temps & les occasions vous le permetront , vous enuoyant vn memoire plus particulier de nos intentions , suiuant lequel vous vous conduirez vers Messieurs dudit Parlement , priant Dieu

TRES-CHER FRERE,

Qu'il vous tienne en sa sainte garde. A Roüen en Parlement le premier iour de Fevrier 1649. Les Gens tenans la Cour de Parlement en Normandie vos Freres. Signé, VAIGNON , Greffier en chef de ladite Cour.

Et au dessus est escrit, A Monsieur, Monsieur Miron, Conseiller du Roy en la Cour de Parlement de Normandie, à Paris.



LETTRE DV PARLEMENT
de Normandie enuoyée à la Cour de
Parlement de Paris.



ESSIEURS,

Toute la France & les monumens publics sont des tesmoins trop asseurez de vostre fidelité au ser-
uice du Roy, & de vostre zele à la conseruation &
grandeur de son Estat, pour croire que la calomnie
ait peu faire impressiion, au contraire dans les esprits
des gens de bien & à vostre exemple, les autres Parle-
mens ont tousiours affermy dans les cœurs des peu-
ples, les veritables sentimens de fidelité & d'obeis-
sance qui sont deus à la Majesté Royale. Nous vous
remercions de la part que vous nous auez donnée
de vos resolutions en ce dernier rencontre, que vous
tesmoignez auoir l'approbation de tant de Princes,
Ducs & Pairs, & Officiers de la Couronne interessés
au repos & grandeur de cette Monarchie, Et vous
asseurons que comme l'autorité que le Roy a mise
en nos mains, ne tire sa vigueur & sa puissance que
de sa Souueraineté, Nous amployerons ainsi que
voust tous, les moyens à nous possibles pour empes-


cher la naissance d'une guerre civile, & pour la
 conseruation de sa personne & de son autorité.
 Pour à quoy paruenir, nous conseruerons tousiours
 avec vous cette parfaite intelligence que vous de-
 sirez de nous, qui sommes,

MESSIEURS,

Vos bons Freres & amis les Gens tenans la Cour de
 Parlement de Normandie. Signé V A I G N O N, Gref-
 fier en chef de ladite Cour.

*Et au dos est escrit, A Messieurs, Messieurs les Gens
 tenans la Cour de Parlement de Paris, A Paris.*

Ce 1. iour de Fevrier 1649.



ARREST DE LA COVR DE
 Parlement de Normandie, sur la reuocation
 du Semestre de ladite Cour.

Extrait des Registres de la Cour de Parlement.



LA COVR, les Chambres assemblées,
 assistans en icelle le Seigneur Duc de
 Longueuille Gouverneur pour le Roy
 en la Prouince de Normandie, & le
 Sieur de Beuuron Lieutenant General
 audit Gouvernement, s'estant fait représenter l'Edit

du mois de Ianuier mil six cens quarante & vn, portant creation de plusieurs Officiers en ladite Cour, pour estre tenuë à l'aduenir par deux seances & ouuertures Semestres, au preiudice de son ancienne institution establie en vne seance continuë, à la supplication des trois ordres de la Prouince par le Roy Louis douziesme à l'instar du Parlement de Paris: Ledit Edit registré, non en plain Parlement, comme doiuent estre tous les Edits & volonte des Roys selon les formes anciennes & loix du Royaume, ains par Commissaires tirez du corps du Parlement de Paris le seiziesme d'Auril ensuiuant, & dont la Commission n'auoit esté registrée audit Parlement: La Declaration du deuxiesme May audit an, portant dispense octroyée aux pourueus des charges de la nouvelle creation dudit Edit pour exercer leurs charges en l'aage de vingt-deux ans, aussi registrée par lesdits Commissaires le vingt-huictiesme Iuin audit an: Autres Lettres de dispense du dix-septiesme Decembre mil six cens quarante-cinq, octroyées pour receuoir vn desdits Officiers à l'aage de dix-neuf ans, & autres dispenses particulieres au dessous de l'aage porté par ladite dispense generale, obtenues contre & au preiudice des Ordonnances verifiées en toutes les Cours Souueraines, & Declaration registrée en ladite Cour le vingt-vniesme Mars 1639. portant defences d'auoir esgard à telles dispenses: Autre Declaration du cinquiesme iour de Mars 1642. registrée le huictiesme May ensuiuant, par autres Commissaires tenans ladite Cour, substituez à


ceux du Parlement de Paris, contenant qu'à la reception desdits Officiers de ladite nouvelle creation, il n'assisteroit qu'un tiers de l'ancienne creation, & deux tiers de la nouvelle, suivant laquelle les receptions desdits nouveaux pourueus auroient esté faites : Autres Lettres Patentes en forme d'Edit du 14. Februrier 1643. portant reuocation dudit Semestre cōme dommageable à la Prouince & aux subjets du Roy, & contraire au premier establissement de ladite Cour, sans aucune clause de nouvelle creation ny de validation des receptions de ceux qui auoient esté receus esdites charges nouvelles. Arrest du Conseil du 30. Aoust 1645. interuenu sur les requestes des traitans & Officiers receus de ladite nouvelle creation, portant reestablissement dudit Semestre surennoncez esdites requestes plaines de suppositiōs Autre Arrest signé en Commandement du 20. de Septembre ensuiuant, faisant defences aux Presidents & Conseillers tenans lors la Chambre des Vacations de ladite Cour, de plus exercer, & à tous autres Officiers dudit Parlement de faire aucune fonction iusques au premier iour de Mars ensuiuant, à peine de crime de faux & desobeissance, signifié avec le precedent à l'Aduocat General de ladite Cour, le 30. dudit mois. Autres Lettres en forme d'Edits, l'un du 8. Septembre audit an en consequence dudit Arrest du 30. Aoust, portant reestablissement dudit Semestre & des Officiers supprimez par ledit Edit du 14. Februrier 1643. & l'autre donné à Fontainebleau au mois d'Octobre ensuiuant, portant crea-

tion de sept autres Offices de Conseillers en ladite Cour, registrez les 10. & 27. dudit mois audit temps des Vacations, sans conuoyer le Parlement, par trois Maistres des Requestes, & les Officiers de ladite nouvelle creation qui estoient demeurez suivant le dit Edit du 14. Februrier 1643. Extraict des Registres de ladite Cour des dernier Aoust & 2. Octobre 1645. premier Mars mil six-cens quarante-six, 2. Mars mil six cens quarante-sept, & deuxiesme Mars mil six cens quarante-huict, contenant les Declarations de nullité dudit establissement & reestablissement de Semestres, & de tout ce qui s'estoit fait au prejudice des formes anciennes : La matiere mise en deliberation ; Tout consideré, LADITE COUR, sous le bon plaisir du Roy, a declaré & declare les registremens, tant desdits Edits du mois de Ianuier 1641. Februrier 1643. & Octobre 1645. que desdites Declarations & receptions des pourueus desdites charges de nouvelle creation, & tout ce qui s'est ensuiuy nuls, & de nul effet, comme faits contre & au prejudice des anciennes Ordonnances & loix du Royaume : Faisant inhibitions & defences ausdits pourueus d'en faire aucune fonction, & aux sujets du Roy de les reconnoistre en ladite qualité. O DONNE que ledit Parlement sera tenu en la mesme forme & maniere qu'il estoit en l'année 1639. & que tres-humbles remonstrances seront faites à sa Majesté, de la consequence & importance desdits Edits. Et sera le present Arrest leu & publié à la Barre de la Salle du Palais, & les Vidimus d'iceluy enuoyez par les

Bailliages & Vicomtez, pour y estre pareillemēt leus,
publiez & registrez. Fait & arresté à Rouën, en la-
dite Cour de Parlement, les Chambres assemblées,
le 27.iour de Ianuier 1649. Leu, & publié à la Barre
de la Salle du Palais, le trentiesme dudit mois & an.

Signé,

VAIGNON.



AVTRE ARREST DE LADITE

Cour de Parlemet de Normandie, portant
defenses de faire aucunes leuées ny logement
de gens de guerre, sans ordre & attache de
Monsieur le Duc de Longueville, Gouver-
neur pour le Roy en ladite Prouince, ny faire
aucunes leuées de deniers, sans Commission
du Roy, registrée aux Compagnies Souue-
raines.

Extrait des Registres de la Cour de Parlement.



LA COVR, toutes les Chambres assem-
blées, present le Seigneur Duc de Lon-
gueville Gouverneur de Normandie, le
Sieur Marquis de Beuron Lieutenant
General pour sa Majesté en ladite Prouince, & les
deputez des autres Compagnies Souueraines; Sur
laduis à elle donné des pilleries, extorsions & vio-
lences faites tant aux environs de la ville de Rouën
qu'ailleurs en la Prouince, Desirant pouruoir au bien
du seruice du Roy, repos & tranquillité de ladite

Prouince, A ordonné & ordonne qu'il en sera informé en cette Ville, par les Conseillers Commissaires à ce deputez, & sur les lieux par les Juges ordinaires. Fait inhibitions & defenses à toutes personnes de quelque qualité & condition qu'elles soient, de faire aucunes leuées ny logemens de gens de guerre en icelle, sans ordre & attache dudit Seigneur Duc de Longueuille : Et en cas de contrauention, enjoint à tous Gouverneurs & Capitaines des Places, Maires & Escheuins des Villes, Gentils-hommes & Communautéz, de courre sus, prester main forte & obeïr à ceux qui y seront preposez par ledit Gouverneur, ou par les Lieutenans Generaux de sa Majesté en la Prouince. Fait aussi defenses ausdits Gouverneurs & Capitaines des Places, Maires & Escheuins; Gentils-hommes & Communautéz de receuoir aucunes troupes, ny leur fournir aucuns viures, armes ou munitions de guerre : Et où aucuns se seroient emparez d'icelles sans attache dudit Gouverneur, Enjoint de s'assembler au son du tocsin, pour les en chasser & mettre hors. A pareillement fait inhibitions & defenses de faire aucunes leuées de deniers sans Commission du Roy registrée aux Cōpagnies Souueraines, auxquelles la connoissance en appartient. Et sera le present Arrest imprimé, leu, publié & affiché où il appartiendra, & enuoyé par les Bailliages pour estre leu aux Parroisses de cette Prouince. Fait à Rouën en ladite Cour de Parlement, toutes les Chambres assemblées, le 30. iour de Ianuier 1649.

Signé,

VAIGNON.

AVTRE